

寶坻政書卷之二

門生 劉小謨 王好善 編輯

睦僚書

先生待僚友恩義兼盡前後相聚多賢者內以道相夾持外以道義相援引藹然一體也間有不檢者指其事而諄諄誨之然上官有所聞輒不避嫌疑曲為營解故先生在任時諸寮友靡不砥礪靡不得獎薦者其事不能具述姑就先生所著同寅錄輯睦僚書

卷之二

陰之說至於同官暫聚出入相依遠則四五年近則一二年又瞬息中之瞬息也及今不相砥礪共脩大業使同肝協膽永訂心期一朝別去欲求復聚不可得矣爰列數條相與共守之

一同官有兄弟之義較之同年尤為親厚蓋同年係一日開榜之情而同官有數年義聚之樂其分頗殊惟同官相聚而不勗以道義於是情意不洽邈如路人矣甚至有背毀而面諛心非而口諾者皆世之僂民也我輩須德業相勸過失相規患難相恤毋論今日相與藹如一家即他年相別升沉路

珠亦須敦世講之誼近則子孫拜候義篤通家遠
則書問往還情敦骨肉此理此義直逼古人千萬
毋忽

一官之受賄猶女之失節也失節之女人盡鄙之官
受賄而不耻者良心盡喪也我輩既號同心各當
砥礪名節以清廉自誓昔范文正公讀書長白寺
掘地見金一窖亟瘞之告王僧曰吾他日當脩此
寺及公為西帥僧使其徒謁之公一無所助但贈
書一封茶一筵而已僧歸拆書則云殿後有金一
窖如言發之得銀四萬二千餘兩用脩寺餘銀復

卷之二

二

造范公橋後公入相計所得俸銀適四萬二千有
餘有王御史者巡按廣東將入境宿郵傳中夙多
怪夜半有鬼跪於床前曰吾守藏神也有銀十萬
係君之物為君守此多年矣問在何處鬼即入床
下而沒御史起就其處掘土尺許則燦然充仞也
御史素貪祗任百計需索滿載而歸至前郵亭中
發床下之藏則空無物矣私計其橐中之贓則數
亦相符大抵人生財祿原有定數貪者枉自穢污
而終身不能得一毫非分之物廉者落得清脩而
終不失吾命中所有之財請細思之

一古人有云非澹泊無以明志非寧靜無以致遠欲
勵廉德先崇節儉糲飯菜羹可以供客惡衣菲食
可以臨民除小倡俗樂及賞錢等相約久不用外
今後每會食不過五品三葷二素不許宰牲不許
開卓有隨時鮮果或用一二不得過豐蓋民間風
俗自官府敦之實抵士風頗厚儻不崇儉素惟導
以奢靡豈惟有損士風兼當得奢侈不惜福之報
矣

一書柬往來只用單帖有事即書帖上不必更備副
啓直書本情不必文飾要使實意薰蒸繁縟盡減

庶存雅道

一舊時各衙小菜皆係園頭供給其來已久受之似
不為過但願為廉吏則一針一草皆不可費民之
力故謝絕之今與相約但衙中隙地皆令種蔬儘
足供給且不使家人輩無事而食長其游惰也

一往時買辦內有支房外有舖行取用甚易今悉革
去各發銀現買須稍優其值使小民樂與官為市
不然胥隸出入緣肆侵欺自以為平而實尅之矣
一官無崇卑皆民望也一念愛民便可布德一毫不
慎或致播殃我蒙祖宗福蔭而受朝廷一命之寄

若不布德而播殃焉則先世所積之慶自我斬之
矣其何能忍今日相約待人求恕處事求忠財用
求省刑罰求輕斷獄一節尤當加意事有可惡而
尤原其情情無可矜而尤量其無知憫其失教必
於死中求生惡處求愛斯為邁種德之道學中三
師雖無政事之寄實有教化之責一啟口也無益
於人勿言一舉足也無益於人勿行一臨事也無
益於人勿處積之久久福將自大每人各置一籍
每日所行之事或善或惡随手記之月終一會出
簿互觀以驗學問之消長

卷之二

四

一本縣詞訟軍匠發二衙錢糧馬匹發三衙鬪毆盜
賊發四衙其事關風化及豪強難制者留堂自理
並不差人皆原告自拘不服則令保正催拘頗為
省事今後各衙亦宜遵此除巡捕強盜許差人密
緝外其餘一應公事皆守堂規庶為得體

一教化是今日急務朔望為諸生講書逢九約諸生
會課豈僅僅為舉業哉專冀語言文字之外或有
所感發耳然教人以言不若示人以行我輩誠相
與實敦行誼一廉如水而不矯激以沽清名而
民而不嚴刑以求速化愛人則寧人負我毋我負

人處事則務盡其心勿期其效凡我同官孰非良士孰非有教化之責者願相與勉之

一傳曰國之大事在祀與戎我輩當祭祀齋戒之日須真不飲酒食肉真不妄言妄動庶有感格不然外慢神明內褻心志其人福慶必不長矣

一迎送進退士民於此乎觀禮出入三讓祇依古禮舉手為揖雍容退遜毋傲容毋惰志足以明禮矣若心存忽慢而外則折腰掃地情之不衷亦可恥也

一燕會之日惟許談詩書說禮樂或商量民間疾苦

卷之二

五

不得說人過失及鄙穢事犯者以巨觥罰之

一改過遷善原非二事改一分過便遷一分善故我輩自朝至暮只有改過一着工夫譬如目病但有去翳藥並無添光藥也既為良朋所貴實心攻病苦口發藥或有所聞即密規誨或貽書箴勸縱使言之不當亦宜虛懷聽受痛刷前非儻怙終不悛衆共棄之

一中庸叙五倫獨朋友多一交字交者謂交相通也我之心彼知之彼之心我知之我之事彼能謀之彼之事我能謀之夫是之謂交今年同官白首

不相知者有緩急無所恃者豈末世之交道衰歟
非然也由我平日不能先施於朋友耳凡我同好
胥非薄徒迹有可疑務諒其心事有難處務謀之
以忠大率天下事非一人所能獨運孰可為股肱
則任奔走之勞孰可為心膂則盡籌畫之計分猷
共念彼此各期於有成則交自我篤而世風從此
厚矣